

Udin, ai 29 di Avrîl dal 2015

ARLeF: un vinars cun cartons animâts e cul promo di Lodovica Comello

*Un video inedit par furlan de famose atore al vierzarà il dopomisdì divertent di **FûrxFur** (ai 8 di Mai), gnûf projet de Agenzie, dentri tal cartelon di **vicino/lontano***

Al sarà un video inedit di **Lodovica Comello** a vierzi il prin event public dal **projet FûrxFur**, finanziât de **ARLeF** e realizât de **Cooperative Informazion Furlane di Udin**, **vinars ai 8 di Mai**, dentri dal cartelon siôr di **vicino/lontano**. La atore e cjantante televisive furlane, stele de telenovela argentine “**Violetta**”, e à acetât di fâ di **testimonial al projet FûrxFur realizant un video promozionâl di cualchi secont te sô lenghe mari: il furlan**: «O soi simpri ator pal mont cu la mê musiche, ma us parial che o stedi fevelant par inglês?».

«Il gnûf projet – al spieghes il president de Agenzie regjonâl, Lorenzo Fabbro – al è stât ideât par promovi e veicolâ l’ûs de lenghe furlane tant che strument di comunicazion normâl in manifestazions e events di caratar trasversâl, vierts al public. Par chest fin, a son stadis individuadis une desene di manifestazions che si davuelzin tes trê provinciis furlanis dilunc dal an. Comencin di Udin, cun vicino/lontano».

Chel dal 8 di Mai, **des 14.00 indevant**, al sarà un dopomisdì divertent viert a ducj (**la jentrade e je libare**), ma pensât di pueste pai fruts. Daspò de presentazion dal video-promo di Lodovica Comello, te **glesie di Sant Francesc, a Udin**, al sarà proietât il dissen animât “**Âf blu**”, ideât e realizât di Giorgio Cantoni, Serena Di Blasio e Giulia Spanghero: la prime produzion dute furlane sostignude de ARLeF. Aes 14.30 e sarà la leture interative in plui lenghis, cun zûcs e videoproiezioni, di “**S_cûr sot sore/D_heart_k upside down**” (un libri pe infanzie che al conte la tragjedi de Costa Concordia viodude cui voi di une frute), di Laura Nicoloso, Silvia Ganzitti e Daniele Frattolin. La part musicâl e sarà par cure di Domenico e Daniele Ursella ae armoniche e al liron. Il program dal dopomisdì si sierarà cu la tornade tant spietade dal **dissen animât de La Pimpa**, cetant amât dai fruts di dutis lis etâts. Il fumut, che al à par protagoniste la famose e simpatiche cjiçute blancje a boi ros, al è stât ideât di Francesco Tullio Altan tal 1975. Tal 2002 al è diventât un carton animât produsût e mandât in onde de sede RAI dal FVJ, in lenghe furlane, cuntun sucès grandonon. La Pimpa, di fat, e je stade voltade ancje par inglês, spagnûl, todesc, francês e in altris lenghis minorizadis tant che il ladin e il sart.

Pe ocasion, a ducj i fruts che a parteciparan al dopomisdì di FûrxFur, ur saran dâts omaçs simpatics che a “fevelin” par furlan.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<